

全真青玄济炼焰口铁罐施食全集

“放焰口”是 道教萨祖铁罐施食科仪的俗称，即斋主设置水陆道场，请道士念咒施法，把水、食物等供品化为醍醐甘露，赈济九世父母及各类饿鬼亡魂，使之得到超脱，往生天 界，永离苦海。通过庄重肃穆的法事活动，让神灵认知斋主敬天法祖、报答亲恩的孝心 功德，从而保佑生者福寿康宁，吉祥如意，让死者脱离苦海，共涉仙乡。

- [经文](#)
- [视频分享](#)

经文

功文

伏以

三宝慈悲，必证风云之会，五浊恶世，难通清净之天。

凡欲利济于幽冥，先当洁净于坛所。

俾形神之清净，度幽魂于沾恩。

羽众慈悲，众当持诵。

小赞

青华教主，太乙慈尊，玉清应化现金身。

大千甘露门，接引群生（亡魂），永出爱河津。

功文

臣闻

道无可道五千言，开大道之宗。

法裔嗣法，亿万劫合玄法之典。

但臣功无寸积，敢云启后以承先。

嗣系教有别传，当兹济幽而利显。

仰仗慈尊加护，帅将扶持，是夜布灵宝之金光，至使昏炬照夜府，闻天尊之宝号，由是火宅以清凉。

法师登台，阐扬妙典。

道众

伏以

青华演教，宏开救苦之门。

西蜀传经，广演度人之典。

兹者，瑶坛星拱，宝篆云开，群沾玉局之森严，

共睹琅函之璀璨。仰维法驾，俯赐临轩。

积九还七返之功，同归太极。

解三途五苦之众，出离轮回。

物我均沾，幽冥两利。须至登台迎迓者。

功文：太极亲传须自炼，自炼功夫人不见。

道众：采得坎离结婴儿，相配龙虎生雷电。

功文：度幽魂，炼宗眷，慢上重楼十二院。

道众：泥丸宫内会群仙，逍遥俱赴蟠桃宴。

功文：此台高不高兮，

道众：举头三尺，

功文：低不低兮，

道众：去地五丈，

功文：是昔太上说法，

道众：今夜度人无量。

度人无量天尊。

功：好个法王宝座，巍巍玉局层台。

提：浮空妙气于徘徊，一切羽士赞妙斋。

功：七宝林中七宝台，宝林宝树宝花开。

提：若要亡灵升仙界，请师登上法王台。

功：太上说法为教主，拔度亡者出迷途。

提：臣今端简法台下，端听三声鸣法鼓。

功：执事者各执其事，

提：执鼓师发鼓三通。（击鼓三通）

功：法鼓三通叩，琳琅彻十方。

提：高功登宝座，说法度存亡。

高升平座天尊。

功：此座此座非凡座，救苦天尊曾坐过。

提：吾今说法度存亡，一切地狱都解脱。

升天得道天尊。

功：太乙天尊坐莲台，十殿阎君两边排。

提：判官展开生死簿，摄召灵魂受度来。

法食神变天尊。

功：救苦天尊下降，万朵金莲足踏。

提：九头狮子出云霞，五色祥云捧驾。

功：来到升仙台上，浮空而坐说法。

表：拔度亡魂升天霞，早赴蓬莱会下。

香林说法天尊。

功：太上慈悲宝忏，拔度亡者生天。

表：恐堕幽冥在黄泉，全凭道力追荐。

功：申奏东岳天齐，表启救苦青玄。

表：十王判断早升天，哪怕三曹对案。

提：法众虔诚，

表：称扬大赞。

慈尊赞

慈尊九色莲花座，座座七宝骞林。

骞林百亿瑞光中，瑞光中现出妙严宫。

妙严宫中端然座，座座就金容。

金容手执绿杨枝，绿杨枝遍洒洒遍虚空。

虚空景界难描画，画画就无穷。

无穷无尽拔度亡灵，度亡灵上往往上南宫。

功：太上立教说法，众生悉皆闻知。

提：慈风浩荡透硃石，哀悯幽魂出离。

功：闻法昭彰，句赞坛中，忏礼希夷。

表：十类孤魂尽皈依，今宵黄篆妙偈。

黄篆斋

黄篆斋筵临妙宫，青城山下说原因。

张氏丽华曾造罪，三官考较甚分明。

丈人观里求忏悔，哀告黄冠李若冲。

经卷未完离地府，速登云路早超生。

鱼

一片贪嗔痴，到底返成苦海。大慈方成教，今宵得遇慈航。

南辰光芒北斗明，犹闻窗下读书声。

孤魂万里复归去，空负洛阳花满城。

太上大道君，位列无何乡。宝光真童子，下履九幽房。

悲哉孤魂众，拔度痛哀伤。二十四门户，咸令闻宝香。

明灯照长夜，永消黑薄殃。

大慈大悲，寻声救苦，无上无上慈尊。

提：稽首皈依大罗天，慈悲赦罪在人间。

表：若要亡魂升仙界，启请神咒大众宣。

仰启咒

仰启碧云大教主，唵哑吽。

一元无上萨仙翁，吒唎吽吽唵哑吽。

先天雷部大尚书，唵哑吽。

亲授铁师传妙旨，吒唎吽吽唵哑吽。

手持五明降鬼扇，唵哑吽。

身披百纳伏魔衣，吒唎吽吽唵哑吽。

常将铁罐食加持，唵哑吽。

普济含灵皆得度，吒唎吽吽唵哑吽。

咒枣书符皆有应，唵哑吽。

代天宣化总无私，吒唎吽吽唵哑吽。

云游天下至龙兴，唵哑吽。

铁面将军潭底现，吒唎吽吽唵哑吽。

一十二年观过错，唵哑吽。

百千万种积功勋，吒唎吽吽唵哑吽。

忙把誓盟朝上帝，唵哑吽。

普令三界悉皈依，吒唎吽吽唵哑吽。

治病回生如反掌，唵哑吽。

开化附体阐威灵，吒唎吽吽唵哑吽。

弟子（我今）启请望来临，唵哑吽。

伏望师恩加拥护，吒唎吽吽唵哑吽。

香云达信天尊。

功文

伏以

香乃玉华散景，九炁含烟，香云弥罗，迳达三天。

默运一诚，先吟三礼。

三信礼

功吟：志一心信礼。

众唱：玉清宫 元始主，三界师 四生父。唵吽唎。

若皈依 大慈悲，能灭孤魂身业罪。唵吽唎。

可诵：欲求解脱免轮回，凭道宝 恩光力（唵吽唎）。

众幽魂，蒙赈济，各承饱暖升天去（唵吽唎）。

登阆苑 赴瑶池，俱入蓬莱三岛会（唵吽唎）。

略：十方常住道宝天尊。

鱼 《云霄引》

虚无自然真常道，道教之中玄中妙。

妙有法力无边广，度脱真灵成仙道。

若要孤魂升仙界，稽首皈依无上道。

鱼 《三拿鹅》

稽首皈依无上道，道宝道宝慈尊。

先天立教，亿劫亿劫度人。

鸿蒙未判，开天辟地独为尊。

玉清圣境，元始元始高尊。

愿垂法语，救度亡灵。忏灭亡灵身孽罪。

拔离苦海，超出超出尘沦。

惟愿身孽罪消灭，接引亡灵，上往往上玉清。

功吟：志一心信礼。

众唱：上清宫 玉宸尊，济生死 度群迷。唵吽咧。

若皈依 大慈悲，能灭孤魂心孽罪。唵吽咧。

可诵：欲求解脱免轮回，凭经宝 恩光力（唵吽咧）。

众幽魂 蒙赈济，各承饱暖升天去（唵吽咧）。

登阆苑 赴瑶池，俱入蓬莱三岛会（唵吽咧）。

略：十方常住经宝天尊。

鱼 《云霄引》

灵宝无量度人经，经育法力大功能。

能度亡灵出苦海，苦海得度礼真经。

若要亡灵出仙界，稽首皈依太上经。

鱼 《三拿鹅》

稽首皈依太上经，经宝经宝慈尊。

传法立教，开悟开悟后人。

混沌未分，祖劫化生独为尊。

上清真境，灵宝灵宝高尊。

愿垂惠泽，救度亡灵。

忏灭亡灵心孽罪。

拔离迷途，超出超出凡尘。

惟愿心孽罪消灭，接引亡灵，上往往上上清。

功吟：志一心信礼。

众唱：太清宫 混元主，传科旨 训贤愚。唵吽唎。

若皈依 大慈悲，能灭孤魂口孽罪。唵吽唎。

可诵：欲求解脱免轮回，凭师宝恩光力（唵吽唎）。

众幽魂蒙赈济，各承饱暖升天去（唵吽唎）。

登阆苑赴瑶池，俱入蓬莱三岛会（唵吽唎）。

略：十方常住师宝天尊。

鱼 《云霄引》

玄中启教大法师，法师度脱赞希夷。夷与亡灵出苦海，苦海得度礼真师。若要亡灵升天界，稽首皈依玄上师。

鱼 《三拿鹅》

稽首皈依玄上师，师宝师宝慈尊。

随方设教，历劫历劫度人。

假名易号，隐圣显凡独为尊。

太清仙境，道德道德高尊。

愿垂法慈，救度亡灵。

忏灭亡灵口孽罪。

拔离三途，超出超出凡笼。

惟愿口孽罪消灭，接引亡灵，上往往上太清。

提：太乙天尊座东阳，手内杨柳洒琼浆。

表：身骑九头青狮子，拔度亡者上天堂。

功文

臣闻，大而化之知谓圣，妙莫能名。

神而明之存乎人，无求不应。

凡伸启请，必赐鉴观。太上垂科，虚皇演教。

大开殊常之妙会，广开不二之法门。

宣利济之经言，度幽魂之滞魄。

谨按经云，此诸罪辈，旷劫以来纵无名性，造十恶孽。

六尘染，三业萦缠。

肆意任心，曾无觉悟。阴罪阳过，日积月深。

背道违真，顺邪弃正。举心运念，动结愆尤。

遂使命过之后，身落三途，不得解脱。

或于兵戈劫难，饥馑阵亡，投崖溺水，车碾马踏，虎啖蛇伤，自缢身亡。

非命者不一，横死者何多。生即受殃，死犹抱苦。

恭惟救苦之慈尊，广发慈悲之鸿愿，嗟九泉之苦爽，悯六道之众生。

开度长夜，济拔幽魂。出离重泉，咸登道岸。

遂使孽罔顿释，得睹光明。今遇法会，同升仙界。

两头一样赞

金炉添炷返魂香，梵响空歌声韵长。

圣号已闻金阙下，幽关咸睹玉毫光。

三途五苦离长夜，十类孤魂赴道场。

享此无边甘露味，自然热恼得清凉。

鱼：始青天上弥罗讳，吾今登上狮子位。

吾为真人说法来，仙花满地金莲坠。

四生六道听宣扬，灵魂早赴慈航会。

提：太乙天尊下紫庭，九幽长夜放光明。

表：千愆只念天尊号，万罪全消一卷经。

《破酆都板》

东方玉宝皇上尊，皇上天尊，风雷地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第一层。

南方玄真万福尊，万福天尊，火翳地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第二层。

西方太妙至极尊，至极天尊，金刚地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第三层。

北方玄上玉宸尊，玉宸天尊，溟冷地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第四层。

东北度仙上圣尊，上圣天尊，镬汤地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第五层。

东南好生度命尊，度命天尊，铜柱地狱拔度亡魂。十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第六层。

西南太灵虚皇尊，虚皇天尊，屠割地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第七层。

西北无量太华尊，太华天尊，火车地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第八层。

上方玉虚明皇尊，明皇天尊，天牢地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第九层。

下方真皇洞神尊，洞神天尊，无间地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第十层。

鱼：九幽拔罪尊，拔罪天尊，无量地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第十一层。

法桥大度尊，大度天尊，累劫地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第十二层。

大慈接引尊，接引天尊，女青地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第十三层。

朱陵度命尊，度命天尊，刀山地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第十四层。

慈航苦海尊，苦海天尊，剑树地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第十五层。

青帝护魂尊，护魂天尊，硃石地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第十六层。

白帝滞魄尊，滞魄天尊，寒冰地狱拔度亡魂。

十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第十七层。

转轮圣王尊，圣王天尊，炉碳地狱拔度亡魂。十方灵宝救苦尊救苦天尊，唵哑吽，吽哑唎，吽吽吽，东极宫中，破开酆都第十八层。

大慈接引天尊。

鱼：伏以，阴阳造化，爰从生杀之机。

善恶循环，各有昏明之路。升沉异趣，还从祸福之推。

或从恶缘，或行善利。修堕皆由于自己，见邪总逆于人为。

情分三界之中，性受五行之内。随果形报，逐业缘生。

或异类于千般，贵贱殊途，尽属阴阳之类。

性本一致，号出二名。或人伦于数种。

冥冥长夜，杳杳幽途。

嗟幻化之无常，叹轮回之不息。

或有穷魂饿鬼，无墓冢以依栖，滞魄孤魂，绝子孙之祭祀。

或有多生遭罪，曩劫貽愆。或上祖留殃，自身积衅。

或文官路逝，武将阵亡。前谋佐国之荣，逐失治身之道。

或名贡举监，求之不得。弓弩刀枪，对斗而亡。

施为未显于才能，得业已成而弃世。

或亏忠叛背，邪佞乖遭。

全家受责罚之殃，自身获重刑之罪。

轻亲不孝，慢上无徒。遭国法以摧残，犯天诛而被裯。

典司卒吏，执役兵徒。

怀能抱术之人，得艺良才之士。

心灵手妙，巧匠工奇。

受沉痾而客死他乡，染时疫而身亡故里。

或商贾而车擎负载，或游食而散淡前行。

或弃舟而沉溺波涛，或出陆而倾亡旅邸。

或逢强徒劫盗，或遇猛兽虺蛇。或鰥夫寡妇以无倚，或独老孤男而无靠。咒诅阴谋之辈，故杀误伤之徒。

或啣冤久处冥关，或枉死未离鬼市。

生产不全于母子，盲聋不便于东西。

或奴婢驱役于逃亡，或娼妓孤单而失所。

或大小亲疏，为名利以争杀，或贤愚贵贱，因酒色而伤残。

五行卜命之流，三教论经之士。

或假法而求利，或学道以求名。

形骸不足于人伦，冠带未全于表里。

或因火焚水溺，或自缢刀伤。

或逢石压土埋，瘟疫雷伐。

金木克期，落井堕坑。是男是女，或老或少。

千行万术，百家九流。地狱神祇，畜生饿鬼。

胎卵湿化，附木精灵。

年深而尸骸暴露，岁久而魂飞魄散。

身欠衣而裸体，口无食以枯肠。

塘畔披头风雨露，路上江边霜雪夜。

唼唼聚哭，唧唧啼散。

欲超升而何日超升，望解脱而甚时解脱。

今兹胜会，尽愿来临。

入清凉之法水，享无边之香味。

闻妙法而荡除烦恼，听仙经而解悟真常。

罢生生执对之愆，脱世世萦缠之苦。

各相携率，悉赴兰场。整饬威仪，俯从引导。

法众慈悲，同声召请。华幡接引天尊。

功文：灵符一、二、三、四、五道，吾奉道祖法传，
速开东、南、西、北、中央地狱。

急急如律令。

《五召请》

志一心召请。

五（东、南、西、北、中央）方世界，
五（青、白、红、黑、黄）衣童子下瑶阶。
手持五（青、白、红、黑、黄）幡来接引，
引将魂来，引将魂来。

鱼 《阴小赞》

道宝法筵开，妙用奇哉，亡灵灭罪免三灾，青华宝盖来接引，送上天台，送上天台。

略：法通三界天尊。

《救苦咒》

礼拜元始尊 礼拜灵宝尊

礼拜道德尊 礼拜十方灵宝救苦尊

礼拜昊天金阙四帝尊 礼拜供养二大真人

礼拜金阙化身尊

礼拜降魔护道大天尊

唵明明明化灵，唵静静静玄证，唵凡凡凡静应，唵张张张演阳，唵黄黄黄道相，相道黄黄黄，黄黄黄道相，相道黄黄黄，阳演张张张，应静凡凡凡，证玄静静静。

灵化明明明，明明明化灵，明明庆庆呈呈庆，呈庆呈，庆九真，九真庆。

灵化明明明，明明明化灵，静静隆隆虚虚隆，虚隆虚，渊要隆，隆要渊。

证玄静静静，静静静玄证，凡凡景景金金景，金景金，凡金景，金景凡。

应静凡凡凡，凡凡凡静应，张张景景张张景，张景张，景张监，监张景。

阳演张张张，张张张演阳，黄黄辉辉黄黄辉，黄辉黄，道黄辉，黄辉道。

相道黄黄黄，黄黄黄道相，相道黄黄黄，阳演张张张，应静凡凡凡，证玄静静静。

灵化明明明，明明明化灵，明明庆庆呈呈庆九真，真，真，真真真，民其宏，其宏民。

灵化明明明，明明明化灵，静静隆隆虚虚隆要宗，宗，宗，宗宗宗，民其宏，其宏民。

证玄静静静，静静静玄证，凡凡景景金金景金见，见，见，见见见，愿宁冲，宁冲愿。

应静凡凡凡，凡凡凡静应，张张景景张张景张监，监，监，监监监，愿宁冲，宁冲愿。

阳演张张张，张张张演阳，黄黄辉辉黄黄辉黄相，相，相，相相相，相道散，道散相。

相道黄黄黄，黄黄黄道相，相道黄黄黄，阳演张张张，应静凡凡凡，证玄静静静。

灵化明明明，明明明化灵，明明庆庆呈呈尊，音音，音音，音音音音音。

灵化明明明，明明明化灵，静静隆隆虚虚尊，音音，音音，音音音音音。

证玄静静静，静静静玄证，凡凡景景金金尊，空空，空空，空空空空空。

应静凡凡凡，凡凡凡静应，张张景景张张尊，空空，空空，空空空空空。

阳演张张张，张张张演阳，黄黄辉辉黄黄尊，宪宪，宪宪，宪宪宪宪宪。

相道黄黄黄，黄黄黄道相，大悲大愿大圣大慈，十方化号普度亡魂，亿亿劫中度人无量，寻声赴感太乙救苦天尊，青玄上帝。

功文 伏以

天阶夜静，人市更残。

金乌已坠于西山，玉兔将升于东海。

银河耿耿，乃分昼夜之期。

宝篆飘飘，实判鬼神之际。

一声圣号，彻开三途之地狱。

三炷真香，奏启九清之上圣。

遥望天阶，俯躬奏请。

虚无自然金阙七宝上帝

东极宫中大慈仁者

寻声赴感太乙救苦天尊青玄上帝

十方救苦天尊 九幽拔罪天尊

广度沉沦天尊 大慈大悲大惠真人

西河救苦萨翁真人 太极左公仙翁

冲应孚佑真君 神虎何乔官将法部吏兵

三部追魂使者 冥阳开路五道将军

城隍社令 里域都官正神

咸望鸿慈，垂光济度。

提文：臣闻，开天辟地三皇五帝以茫茫，亘古传今四生六道而滚滚。

不假拔度之功，曷使超升之路。

以今善信众等切念孤魂之苦爽，设放云厨之法食。

赈济寒林，统祈超化。

（具有意文，恭对敷宣一入意）。

臣领投词，理难抑违。

恭按玄科之式，宣行摄召之仪。

全赖师真，恩光覆护。

三官彻透于天堂，九窍开通于地府。

含灵沐果，蠢动沾荣。

臣下情无任再拜俟命之至。

干冒宸威，谨启以闻。

今善信众等，洁陈菲供进诣宝坛，专伸上献。

法众运诚，同声应和。

《五供养》

功：玉炉初焚降真香，传诚达悃奏上苍。

提：法众一声仙范举，群真万里彩云祥。

表：斋主（众信）今将香供养，拔度亡者早生方。

香供养，金鼎放毫光，宝盖氤氲极乐界，祥云缭绕大罗天，呈瑞玉皇前，慈云布，飞下九重天，地府曹僚施法雨，酆都山下降凌烟，香散罪魂愆，蒙救度，亡者返仙乡，

斋主（众信）今将香供养，拔度亡者早生方，

斋主（众信）保安康。

功：嫩蕊牡丹上苑花，绛红芍药实堪夸。

提：玉女殷勤亲采取，献时芬馥起云霞。

表：斋主（众信）今将花供养，拔度亡者早生方。

花供养，千载异难量，碧蕊牡丹开美艳，绛红芍药发清香，光艳照十方，诸天界，莲盖满池塘，玉女散时分五彩，金童捧出献千祥，飞下降道场，蒙救度，亡者返仙乡，斋主（众信）今将花供养，拔度亡者早生方，斋主（众信）保安康。

功：才然凤烛灿银灯，能照幽阴放光明。

提：万道霞光开幽暗，九色潋滟照罗酆。

表：斋主（众信）今将灯供养，拔度亡者早生方。

灯供养，普照万天中，潋滟照明非残绿，银灯开处发光生，直至蕊珠宫，三界上，火树玉玲珑，万道霞光辉碧绿，九色潋滟照罗酆，天地悉皆通，蒙救度，亡者返仙乡，斋主（众信）今将灯供养，拔度亡者早生方，斋主（众信）保安康。

功：龙宫海藏聚神兵，乾坤万汇悉皆生。

提：救苦天尊洒甘露，酆都饿鬼得超升。

表：斋主（众信）今将水供养，拔度亡者早生方。

水供养，天一自然生，下作甘泉通地脉，上为雨露洒凡尘，万物得生成，为气露，凝结作寒冰，应变随时分七善，清凉法水显三能，妙力助圆成，蒙救度，亡者返仙乡，斋主（众信）今将水供养，拔度亡者早生方，斋主（众信）保安康。

功：天宫王母献仙桃，荔枝龙眼最为高。

提：昔日苹果曾供养，洗得尘垢不思劳。

表：斋主（众信）今将果供养，拔度亡者上丹霄。

果供养，五色耀金盘，果树花开桃结秀，千树园内李成丹，俱香满庭前，王姥赐，武帝得先尝，紫杏可令老者少，黄梅能使病者安，用献天尊前，蒙救度，亡者返仙乡，斋主（众信）今将果供养，拔度亡者早生方，斋主（众信）保安康。

香厨妙供天尊。

功文

肃静肃静，十方肃静。

法鼓三通，万神咸听。

今有追魂牒文，恭对敷宣。

（鼓止，宣追魂牒）混元宗坛，本坛为追抽魂义事仪，今据中华人民共和国00省00市00区00观地方栖居，奉道诵经，投词济炼，度亡生方，焚修弟子000右洎合观道众人等，是夜投词涓今00月00日00之期，恭就某观设立法台，修建青玄济炼斛食一宵，谨按玄科施食，伊始必集神力追抽正魂除已申牒，諸司外合行，贵治烦为跟索当斋正荐，本观前羽后化各派灵灵众师等众，暨本坛追荐一切亡魂等众，右暨本观各姓功德施主门中先远三代宗亲，并暨寒林会上，四生六道，五音男女，十类无祀孤魂等众，是夜齐诣斋坛享受法食，急准勿误，度人功大，星火奉行。须至牒者右牒上，掌管幽冥追魂使者韩打元帅，准此谨牒，天运00年00月00日00吉时发牒。

功文：向申牒文，宣白云周。

提科：就于法台，用凭火化。

太上洞玄灵宝救苦妙经

尔时，救苦天尊，遍满十方界。

常以威神力，救拔诸众生，得离于迷途，众生不知觉，如盲见日月，我（圣）本太无中，拔领无边际，庆云开生门，祥烟塞死户，初发玄元始，以通祥感机，救一切罪，度一切厄，渺渺超仙源，荡荡自然清，皆承大道力，以伏诸魔精，空中何灼灼，名曰泥丸仙，紫云覆黄老，是名三宝君，还将上天炁，以制九天魂，救苦诸妙神，善见救苦时，天上混无分，天炁归一身，皆成自然人，自然有别体。

本在空洞中，空洞迹非迹，遍体皆虚空。

第一委炁立，第二顺炁生，第三成万法，第四生光明，天上三十六，地下三十六，太玄无边际，妙哉大洞经。

皈命太上尊，能消一切罪。

东方玉宝皇上天尊，南方玄真万福天尊，

西方太妙至极天尊，北方玄上玉辰天尊，

东北方度仙上圣天尊，东南方好生度命天尊，

西南方太灵虚皇天尊，西北方无量太华天尊，

上方玉虚明皇天尊，下方真皇洞神天尊。

道言：十方诸天尊，其数如沙尘，化形十方界，普济度天人，委炁聚功德，同声救罪人（罪魂），罪人实可哀，我今（天尊）说妙经，念诵无休息，归身不暂停，天堂享大福，地狱无苦声，火翳（yì）成清署，剑树化为蹻，上登朱陵府，下入开光门，超度三界难，迳上元始天，于是飞天神王，无鞅数众，瞻仰尊颜。

而作颂曰，天尊说经教，接引于浮生，勤修学无为，悟真道自成，不迷亦不荒，无我亦无名，朗诵罪福句，万遍心垢清。

尔时，飞天神王，及诸仙众，说是诵毕，稽首天尊，奉辞而退。

提：太乙慈尊大宝莲，仙童接引下三天。

表：香风吹散人间事，拔度亡魂出九泉。

《悲叹韵》

吾今悲叹憾云霄，夜飘飘，水向石边流出冷，魂魄飞夕阳斜。

日月循环西复东，似幻同，惟有江山千万古，磨磨尽几英雄。

秋雨梧桐叶落时，夜驰驰，芦花凋残苔城畔，瞧瞧楼鼓觉摧。

今宵幸遇法筵开，对山崖，奉请亡魂来受度，礼礼拜慈尊上南宫。

功文 伏以，

有痛乎天，盖人心之至理。好生救物，本我道之自然。

惟在精虔，必蒙降格。今则琅函蕊笈，以悉彻于披宣。

素愀丹忱，幸克谐于通感。庆生死之蒙惠，谅幽显以沾恩。伏愿，善见救苦时，遍尘沙而应化。

常以威神力，空地狱以升迁。法众虔诚，称扬宝号。

《达摩引》：天尊慈惠阐冥阳，普与亡灵荐福乡。

甘露流润垂济度，炎池热恼化清凉。

风山香饭琼林果，阆苑瑶池玉液浆。

惟愿神意来盼响，金炉三炷爇名香。

十方救苦天尊。

功：天星朗朗步璇玑，正是瑶坛摄召时。

提：符命告下泉曲府，亡魂来赴太黄旗。

功：三声圣号离长夜，一举华幡彻地祇。

表：接引幽魂瞻师座，快乐天堂无地狱。

《小救苦引》

东极宫中，太乙慈尊。十方化号为救苦，百亿光中现慈容。宏誓愿力深幽阳界，超出苦众生。

尽离幽暗泉曲府，永赐长生免沉沦。

得入天堂中魂自在，迳往朱陵宫。

（前可略）三代宗亲承摄召，一脉先灵早超升。

普度亡过灵魂，升仙界，甘露法王中。

惟愿今宵来赴会，引亡灵，上往往上南宫。

九幽沉沦天尊。

鱼 伏以，

阴阳首判，清浊肇分。尧天荡荡，叹古今之兴废。

禹帝沉沉，嗟贤愚之成败。虎战龙争，混乱天下九洲。

君强臣壮，独并四海一统。六韬三略，盖国英雄何在。

五经四书，贯世文章哪存。三教门徒，九流艺术。

士农工商不等，琴棋书画皆同。

隔越关山之远，漂流云水之乡。

父母资本总成空，恩爱妻子俱是梦。奉公为吏，厌俗出家。

辜负平生之愿，虚劳处世之机。

遭时疫而夫妇并丧，遇产难而母子俱亡。

徙流笞杖以殒身，绞斩分刑而弃命。

饥荒饿殍，大劫枉死。蛇伤虎咬及雷诛，自缢投河并火化。尽是残生恶魄，皆为枉死穷魂。

盲聋喑哑，生为异境之人。瘸跛疯癫，死作离乡之鬼。

罕逢故友，少遇知音。尸露红蓼滩头，骨堆绿柳堤畔。

春去秋来闻鸟唱，寒来暑往听鱼歌。

尺书难寄于双鲤，寸信谁达于孤鸿。

五音苦爽，六道幽灵。黄壤未沾新雨露，红尘不改旧家风。善（众）信敬发慈悯故，真心起奉无上道。

修建九幽之斋筵，赈济三途之穷魂。

闻今一声之召请，勿辞千里而远来。

恭对灯坛，同声赞扬。

《十四召请》

功：灵幡飘荡本无风，风动幡飞瞬息中。

提：幡若风来魂魄附，魂随幡引上南宫。

功：冥冥始觉从前悟，悟了方知彻底空。

表：要知灵幡端的处，灵幡便是主人公。

志一心华幡召请。

北阴界内，地府城中，冥司面然之鬼王，铁围所统之主者。九幽狱，十王狱，君臣宰辅。三曹案，六部案，文武公卿。惟愿，（众诵）展转绿袍离地府，腰悬紫诰出幽京。

罢除嗔怒降斋筵，大舍威光作证盟。此夜今时，来临法会。香花召请望来临，华幡召请望来临。

前亡后化众孤魂，有主无依恐不闻。

星月朦朦笼古道，风雨飘飘罩荒村。

可怜白骨堆黄土，空忆新尸葬旧坟。

此夜好承功德力，华幡召请望来临。

志一心华幡召请。

累朝帝主，历代后妃，冠戴十二冕旒，貌压三千粉黛。

管天下，辖天下，毕竟升迁。歌禁中，舞禁中，终须陨落。

呜呼，岂不闻，五龙驾去不复还，空委箫歌洞府间。

计得当年寝卧处，而今空作九峰山。如是古往今来，累朝帝主，历代后妃，一类金灵等众，此夜今时，来临法会。

香花召请望来临，华幡召请望来临。

孤魂飘荡几春秋，暴露形骸谁与收。

三元五腊无祭祀，四时八节少追修。

魂如柳絮随风舞，魄似桃花逐水流。

今夜荐修无碍供，承此饱暖上天游。

志一心华幡召请。

文章秀士，才艺名儒，槐花梦踏而麀战棘围，杨柳巧穿而争魁兰麝。

口万卷，腹万卷，咫尺功名。经三场，赋三场，空遗尘世。

呜呼，岂不闻，南斗栏栅北斗横，犹闻窗下读书声。

家乡万里复归去，空负洛阳花满城。

如是古往今来，秀士名儒，一类孤魂等众，此夜今时，来临法会。

香花召请望来临，华幡召请望来临。

亡魂一旦适波流，白骨昭然卧荒丘。

鬼火营营阴夜雨，悲风飒飒夕阳秋。

英雄豪杰今何在，荣耀功名尽已休。

全仗羽流吟赞偈，荐此亡魂上天游。

志一心华幡召请。

招提衲子，兰若高流，坐石崖而定镜高悬，翻贝叶而天花乱坠。

非幡动，非风动，心悟禅机。是桥流，是水流，了明觉性。

呜呼，岂不闻，三十年来此地游，木栏花落院重修。

如是又到经行处，树老无花僧白头。

如是古往今来，招提衲子，一类觉灵等众，此夜今时，来临法会。

香花召请望来临，华幡召请望来临。

白骨垒垒葬荒山，万里家乡何处安。

而今惟有西江月，照见青塚黑草般。

天堂有路非遥远，地狱无门咫尺间。

若无太上三乘法，亡魂怎得到人天。

志一心华幡召请。

琳宫羽士，金简玄流，披鹤氅以朝真，戴星冠而礼斗。

道清静，德清静，朝上瑶台。指神仙，学神仙，终归蓬岛。

呜呼，岂不闻，月冷烟霞古道场，先生何处梦黄粱。

丹砂炼就千年药，一点灵光丧北邙。

如是古往今来，养性修真，羽化玄流，一类霞灵等众，此夜今时，来临法会。

香花召请望来临，华幡召请望来临。

璞头象简如春梦，紫袍金带似浮沤。

自古多少英烈士，尽把功名化灰尘。

七尺红罗书大字，一堆黄土盖文章。

总是王侯并宰相，一世功名半点无。

志一心华幡召请。

朝堂卿相，郡邑官僚，忠良常蕴于胸中，生死尽归于笔下。黄金带，白玉带，总是浮沤。

紫罗袍，绿罗袍，犹如风烛。

呜呼，岂不闻，一对朝奏九重天，夕贬朝阳路八千。

如是远来应有意，好收吾骨葬江边。

如是古往今来，卿相元老，一类孤魂等众，此夜今时，来临法会。

香花召请望来临，华幡召请望来临。

遥望江边作钓船，芦花滩头一蓑烟。

巴陵渔翁今何在，青春池边月正圆。

新坟旧墓垒垒骨，家家祭扫各纷然。

可怜节妇江边哭，目睹光阴化纸钱。

志一心华幡召请。

筑台拜将，秉钺武臣，碧纱幢拥万家之兵，金斗印镇三边之地。

坐帷幄，卧帷幄，声振诸侯。入边疆，出边疆，威扬四海。

呜呼，岂不闻，寒来暑往春复秋，夕阳桥下水东流。

将军战马今何在，野草闲花满池愁。如是古往今来，武臣将帅，一类威灵等众，此夜今时，来临法会。

香花召请望来临，华幡召请望来临。

死生生死几时休，物换星移春复秋。

列子如风风御子，庄周蝶梦梦庄周。

回命恰似风中烛，聚散如同水上沤。

识破机关归去也，十洲三岛任意游。

志一心华幡召请。

行船客旅，贾道经商，行行为利与谋财，步步登途而自苦。

身万里，家万里，梦回故里。风半窗，月半窗，宿宵旅馆。呜呼，岂不闻，经营负苦过平生，动是披星戴月行。

财货消磨谁是主，不知身在异乡庭。

如是古往今来，经商客旅，一类孤魂等众，此夜今时，来临法会。

香花召请望来临，华幡召请望来临。

人生倏忽恨难留，百岁如同水上沤。

始觉春花初开绽，又逢落叶送残秋。

几灵容颜葬埋土，无限英雄丧古丘。

承此经功生脱化，早离幽冥上瀛洲。

志一心华幡召请。

田畴老叟，南亩农夫，春耕夏耘蓑笠伴，胼（手胝足终岁勤。

披星出，戴月入，辛苦不辞。过岁丰，遇岁荒，饥寒难免。呜呼，岂不闻，野草闲花色已衰，去了宾鸿今又来。

露冷风寒禾苗尽，惟有梅花待雪开。

如是古往今来，老叟农夫，一类孤魂等众，此夜今时，来临法会。

香花召请望来临，华幡召请望来临。

人生幻化古今同，谁肯将身觉梦中。

百岁光阴弹指过，一生作事转头空。

虚皇演教传经箴，童子持幡驾驿龙。

乘此白云归去好，逍遥稳步上南宫。

志一心华幡召请。

南浮界内，大华国中，贵贱虽殊于两途，贤愚不同于一生。君子辈，小人辈，五音滞魄。

城市住，乡村住，十类孤魂。

惟愿，五音苦爽出寒林，十类孤魂尽沾恩。早向今宵求解脱，承此饱暖上丹天。此夜今时，来临法会。

香花召请望来临，华幡召请望来临。

慈悲设教广无边，普度众生上法船。

金童执幡前引路，玉女左右散香烟。

九头狮子云里现，神光照彻地狱间。

惟愿天尊来下降，拔度亡者出幽关。

志一心华幡召请。

三千界内，四大部中，修身证果以登真，人伦处世而受福。魔灵道，地狱道，闻经改性。饿鬼类，畜生类，听法回心。惟愿，六道幽魂脱苦爽，一灵不昧悟真心。

天堂有路安然走，地狱无门自在行。

此夜今时，来临法会。

香花召请望来临，华幡召请望来临。

日月轮回西复东，明来暗去古今同。

常言人静何曾静，说到真空果是空。

夜间才闻三擂鼓，翻身又听五更钟。

闲时静坐思量老，好似南柯一梦中。

志一心华幡召请。

九州界内，万国之中，南蛮北戎众番人，东夷西狄诸胡汉。大邦君，小邦臣，争强斗勇。文节制，武忠良，舍死忘生。惟愿，天下万国众君臣，世上九州诸公卿。

舍死忘生空费力，争名夺利枉劳心。

此夜今时，来临法会。

香花召请望来临，华幡召请望来临。

一世功名如春梦，百年荣华似浮沤。

劝君罢笔从头数，哪个长生得到头。

阳间有罪朝廷赦，地狱有罪凭追修。

此夜好承功德力，随吾华幡坛前游。

志一心华幡召请。此境界内，附近乡村。

地盘业主及亲邻，阜老先贤并陌客。

有主承，无祭祀，留今更古。

千年坟，万年墓，暑往寒来。惟愿，前亡后化众先贤，有主无依不计年。

罢脱尘笼归汉表，出离苦趣上丹天。此夜今时，来临法会。香花召请望来临，华幡召请望来临。

周秦吴魏鲁汉梁，晋宋齐燕在哪方。

荆棘林中藏五帝，蓬蒿科下掩三皇。

屈原为甚投江死，介子因何抱柳亡。

累代公卿归何处，世上个哪不无常。

志一心华幡召请。

无极界内，有生类中，羽毛鳞角以不同，胎卵湿化而各异。或朝生，或暮死，飞潜走值。若有相，若无相，蠢动含灵。惟愿，生居畜兽与禽虫，尽是当初错用功。

早向今宵求解脱，免堕轮回业报中。此夜今时，来临法会。香花召请望来临，华幡召请望来临。

提：步虚缭绕遍十方，阆苑奇花满道场。

表：奉请亡灵来受度，金炉添炷返魂香。

《返魂香》

一炷返魂香，径通三界路，惟愿大慈悲，宣扬秘密语。

拔度荐亡灵，出离地狱三途苦。

人生百岁如在梦中游，一旦无常归何处。

灵魂从此一去上南宫，朝礼无上虚皇尊。

无上愿亡灵上愿亡灵早超升。

升天得道天尊。

提：天尊符命下丹台，童子传言地狱开。

表：解释伤残全本性，闻经授戒上蓬莱。

功文：

奉玄元召到

幽魂，内有，杀伤、自缢、溺死、胎伤、

塚讼、邪妖、药死、冤债、復连、狱死，

伤亡等众如何赦解，具有十伤符命谨当告下。

《十伤符》

第一法界，一切守边护界，南征北战，东挡西除，将帅军卒，并及犯法遭刑，无辜杀伤，一切孤魂等众，解伤符命，谨当告下。

灵宝净明，解释一切杀伤符命。

右符告下

三界十方，应管六道四生，十类孤魂滞魄，冥司去处，解释一切杀伤孤魂。

遵承符命，咸登道岸。

伏愿命刀断利，宝剑摧锋。永消残害之灾，各随逍遥之乐。出离苦趣，来享玄功。一如诰命，风火驿传。

《阴小赞》

鱼：刑戮杀伤魂，斧刃临身，枪刀剑戟血刃喷，今仗宝诰资度汝，干戈不侵，干戈不侵。

第二法界，一切抱屈负愧，羞惭悬梁，自缢孤魂等众，解伤符命，谨当告下。

灵宝净明，解释一切自缢符命。

右符告下

三界十方，应管六道四生，十类孤魂滞魄，冥司去处，解释一切自缢孤魂。

遵承符命，咸登道岸。伏愿绳索断利，悬梁悉释。

永无自缢之罪，各随逍遥之乐。出离苦趣，来享玄功。

一如诰命，风火驿传。

《阴小赞》

鱼：自缢与伤残，累劫经年，自缢自毒苦无边，蛊纠缠身皆何释，断灭恶缘，断灭恶缘。

第三法界，一切江河湖海，损破船筏，并及投河落湾，溺死孤魂等众，解伤符命，谨当告下。

灵宝净明，解释一切溺死符命。

右符告下

三界十方，应管六道四生，十类孤魂滞魄，冥司去处，解释一切溺死孤魂。遵承符命，咸登道岸。

伏愿早离欲海，速出爱河。永消沉溺之灾，各随逍遥之乐。出离苦趣，来享玄功。一如诰命，风火驿传。

《阴小赞》：（鱼）漂流波涛内，沉溺流漓，慈悲化现蓬莱路，速出爱河成正果，永度迷津，永度迷津。

第四法界，一切冤家债主，今世为儿取命化财，再身离身，产死孤魂等众，解伤符命，谨当告下。

灵宝净明，解释一切胎伤符命。

右符告下

三界十方，应管六道四生，十类孤魂滞魄，冥司去处，解释一切胎伤孤魂。

遵承符命，咸登道岸。伏愿速离孕胞，快出胎养。

永无损伤之虞，各随逍遥之乐。出离苦趣，来享玄功。

一如诰命，风火驿传。

《阴小赞》

鱼：胞胎产婴孩，损堕尘埃，十月怀胎身受灾，未娩灵魂出长夜，超荐形骸，超荐形骸。

第五法界，一切塚讼徵呼，两家相争，倚强凌弱，或遭王法，笞杖徒流，斩绞刖刮，牢狱枷锁，横死孤魂等众，解伤符命，谨当告下。

灵宝净明，解释一切塚讼符命右符告下

三界十方，应管六道四生，十类孤魂滞魄，冥司去处，解释一切塚讼孤魂。

遵承符命，咸登道岸。伏愿速出塚讼，各息争端。

永消追呼之苦，各随逍遥之乐。

出离苦趣，来享玄功。一如诰命，风火驿传。

《阴小赞》

鱼：阴阳妙难通，选择佳城，龙败虎残地脉倾，塚讼徵呼皆消散。

出离阴城，出离阴城。

第六法界，一切邪妖克害，情昏神迷，精耗形枯，一切孤魂等众，解伤符命，谨当告下。

灵宝净明，解释一切邪妖符命，右符告下

三界十方，应管六道四生，十类孤魂滞魄，冥司去处，解释一切邪妖孤魂。遵承符命，咸登道岸。

伏愿返邪归正，慕道求真。永无克害之灾，各随逍遥之乐。出离苦趣，来享玄功。一如诰命，风火驿传。

《阴小赞》

鱼：迷惑苦无边，妖魅克残，恶鬼横行欺罔天，辅正除邪资度汝，劝化成仙，劝化成仙。

第七法界，一切冤家债主，行节生利，荡产破家，药死孤魂等众，解伤符命，谨当告下。

灵宝净明，解释一切药死符命。

右符告下

三界十方，应管六道四生，十类孤魂滞魄，冥司去处，解释一切药死孤魂。

遵承符命，咸登道岸。伏愿天医求赦，扁鹊施功。

永无痛楚之苦，各随逍遥之乐。出离苦趣，来享玄功。

一如诰命，风火驿传。

《阴小赞》

鱼：医道未能精，遍济施功，药有八般犯刑冲，一切中毒药死鬼，荐上南宫，荐上南宫。

第八法界，一切怀恨藏毒，惧怕王法，冤屈无伸，倚势强逼，毒药所残孤魂等众，解伤符命，谨当告下。

灵宝净明，解释一切冤债符命。右符告下

三界十方，应管六道四生，十类孤魂滞魄，冥司去处，解释一切冤债孤魂。遵承符命，咸登道岸。

伏愿仇人冰泮，冤债零消。永无执对之灾，各随逍遥之乐。出离苦趣，来享玄功。一如诰命，风火驿传。

《阴小赞》

鱼：抛撒骗人钱，冤债难免，千生万死要填还，吾今解释冤和孽，永断牵缠，永断牵缠。

第九法界，一切先亡复连，沉痾痼疾，冤魂牵缠，复连孤魂等众，解伤符命，谨当告下。

灵宝净明，解释一切复连符命。

右符告下

三界十方，应管六道四生，十类孤魂滞魄，冥司去处，解释一切复连孤魂。遵承符命，咸登道岸。

伏愿沉痾顿息，宿债咸除。永无传染之灾，各随逍遥之乐。出离苦趣，来享玄功。一如诰命，风火驿传。

《阴小赞》

鱼：妖星法界中，世间流行，瘟疫疫疔复连冲，宿债顿息皆消灭，庆云生生，庆云生生。

第十法界，一切牢狱凶徒，强窃盗贼，非刑狱死，伤亡孤魂等众，解伤符命，谨当告下。

灵宝净明，解释一切狱死符命。

右符告下

三界十方，应管六道四生，十类孤魂滞魄，冥司去处，解释一切狱死孤魂。遵承符命，咸登道岸。

伏愿鞭笞风息，桎梏澄清。永无拘击之灾，各随逍遥之乐。出离苦趣，来享玄功。一如诰命，风火驿传。

《阴小赞》

鱼：有罪并无辜，囚禁囹圄，鞭杖笞流凶徒苦，永消缱绻承道力，罪业蠲除，罪业蠲除。

鱼：昔，南华真人遨游楚国，见白骨一付，磊然仰卧，遂作叹词一首。

仰劳大众，述而歌（念）之。

《金骷髅》

昨日荒郊去玩游，忽睹一付白骨，白骨骷髅。

磊然无语卧荒圪，冷恹恹，风吹败叶，满径满径堆愁。

骷髅骷髅，眷属无音，恩爱恩爱全丢。

雨打风筛今几秋，恨悠悠，不闻人语，惟听惟听溪流。

骷髅骷髅，半世行藏，恍似恍似浮沤。

富贵功名怎到头，枉营谋，金珠万斛，难续难续咽喉。

骷髅骷髅，一旦无常，万事万事全休。

想是前生总欠修，广愆尤，光阴迅速，顷刻顷刻难留。

奉劝人生急早修，莫悠游，早求解脱，同赴同赴瀛洲。

昨日荒郊野外，只见白骨交加，无言无语卧荒沙，又被风吹雨洒。

活时堆金积玉，死后哪个荣华。

三寸气断咬银牙，仰面西江月下。

《银骷髅》

昨日荒郊去玩游，忽睹一个大的大的骷髅。

荆棘丛中草墓圪，冷飕飕，风吹荷叶，荷叶到愁。

骷髅骷髅，你在滴水河边，卧沙卧沙清风，碎草为毡月作灯，冷清清，又无一个来往往来弟兄。

骷髅骷髅，你在路傍，这君子，你是谁家一个一个先亡。

风吹雨洒似雪霜，泪汪汪，痛断痛断肝肠。

骷髅骷髅，我看你，只落得，一对一对眼眶。

看叹人生能几何，莫蹉跎，金乌玉兔，来往往来如梭。

百岁光阴一刹那，似南柯，早求出离，苦海苦海劫磨。

今宵修设冥阳会，金炉内，才焚焚上宝香。

广召灵魂赴道场，消灾障，受沾法力，送往往送仙乡。

追魂度命天尊。

《大叹文》

众诵 伏以，

三途罢拷，六道灵坛。

生于万国九州之地，居于五岳四渎之中。

春秋之世，判乱真主（命君）草主。

战国之时，并吞南朝北朝。

晋宋齐梁，棺椁尽埋于旷野。周秦吴魏，尸骸俱葬于荒郊。春去秋回，四时不逢于祭祀。寒来暑往，八节罕遇于追修。凄凄惨惨，使用钱财哪有。讴讴歌歌，吃穿衣食并无。

冻的皮破肉绽，饿的形瘦骨枯。老的少的，悲悲切切。

大的小的，哭哭啼啼。瘸的跛的，扶墙摩壁。

聋的哑的，摆手摇头。瘫的瞎的，扯扯拽拽。

强的弱的，闹闹迢迢。冷冷清清，饥寒难忍。

泪泪汪汪，苦楚伤情。

功文：

可怜可怜，哀哉哀哉。既到吾坛，必听吾示。

不许混争乱抢，休要逞势撒泼。

莫使粗心大胆，勿得弄犬惊鸡。

早向今宵求解脱，勿学往日用痴迷。

且喜当坛之胜会，丢却背后之是非。最忌蛇心鼠眼，犹嫌虎咽狼飧。

饱则从君请便，饥则任意所殄。

都来拱手听加持，面礼真师求解脱。

尚虑汝等诸仙子众，自倾阳世，久处阴司。

神魂荡散，精魄飞扬。咽喉闭塞，饮食难通。

仰仗道力，宣扬秘咒。

《咽喉咒》

酆都咒：

茫茫酆都中，重重金刚山。灵宝无量光，洞照炎池烦。

七祖诸幽魂，身随香云幡。定慧生莲花，上升神永安。

功德金色光，晖晖开幽暗。华池流真香，莲盖随云浮。

千灵重元和，常居十二楼。急宣灵宝旨，自在天堂游。

寒庭多悲苦，回首礼玄皇。女青灵宝符，中山真帝书。

一念升太清，默念观太无。功德九幽下，旋旋生紫虚。

悲哉苦魂众，热恼三途中。猛火入咽喉，常生饥渴念。

一洒甘露浆，如热得清凉。神魂生大罗，润及于一切。

二洒甘露雨，五脏悉开张。咽喉久冷散，得达悟真常。

三洒甘露水，濯体炼金光。营魄归太上，朝谒礼虚皇。

众生多结冤，冤深难解结。一日结成冤，三世报不歇。

我今传妙法，解除诸冤孽。闻诵志心听，冤家自消灭。

功文：

吾以济拔心，普救群品。吾以哀悯心，普度众生。

仗太上慈光，秉天尊慧力。施无碍无遮之食，祭有情有识之魂。

旁资十类河沙，遍及九州分野。乃至胎卵湿化，鳞甲羽毛。虽云异兽之徒，尽在法界之中。若神若鬼，是男是女。

虽众魂由如尘沙，然此地不过寻丈。

赖威神力，为广度区，容无殃于黍珠，纳须弥于芥子。

尚虑法食有限，尔众无穷，焚化真符，宣扬秘咒。

甘露自天而降，法食如山之高。凡曰饥虚，悉令饱满。

当生惭愧，托化有期。法众虔诚，平等咒食。

清凉甘露天尊。

提科：玉诀应化甘露食，普施河沙众鬼神。

表白：愿皆饱满舍慳贪，脱化人天生净界。

功文：汝等鬼神众，吾今施汝供。

众念：一粒遍十方，河沙鬼神用。

提科：常乐天宫不夜春，普施甘露济群生。

表白：顿悉尘埃归正道，法众调诵五厨经。

《五厨经》

一炁和太和，得一道皆太。和乃无一和，玄理通玄际。

不以意思意，亦不求无思。意而无有意，是法如是持。

莫将心缘心，还莫住绝缘。心在莫存心，真则守真渊。

修理志离志，积修不符离。志而不修志，已业无己知。

诸食炁结炁，非诸久定结。炁归诸本炁，随取当随泄。

奉请变食神王，变食小吏。变此法食，遍满天地。

自然天厨食，普及于一切。神魂饥渴者，尽沾甘露味。

奉请东王公西王母，太乙天尊降甘露。

三天无量食，充满法界中。济汝饥渴者，清净无量身。

饥虚生饱满，热恼得清凉。一切饥渴者，同登极乐界。

鱼：志心皈命礼。

青华长乐界，东极妙严宫。七宝芳萼林，九色莲花座。

万真环拱内。百亿瑞光中，玉清灵宝尊，应化玄元始。

浩劫垂慈济，大千甘露门。

妙道真身，紫金瑞相，随机赴感，誓愿无边。

大圣大慈，大悲大愿。

十方化号，普度众生（亡灵、孤魂、幽魂）。

亿亿劫中，度人无量。

寻声赴感太乙救苦天尊，青玄九阳上帝。

略：十方诸世界，灵宝之众神，十王判司官。惟愿大慈悲，降临来法会。

摄受香花灯水果，惟歆分散妙供养。

一炷真香通信去。五方童子引魂来。

《反五供》

鱼：吽字涌出，香花灯水果，天母供养，一念慈悲放光明。哈哈上尔，手印手印，持妙香花灯水果。

哈哈下尔，手印手印，能相交相交。吽吽哈哈，唵嘛嘛吽哈，微妙香花灯水果，天母供养，供养神，愿我师慈悲哀纳受，天香国色自长春，灿烂盈盘表至诚，梅花宝引垂证鉴，亡灵得度礼慈尊。

《梅花引》

鱼：

稽首东宫主，救苦救苦慈尊。

太上慈仁，广发洪誓愿，度脱度脱众生。

道德天尊，救苦天尊，大惠真人，救苦救苦真人。

九幽地狱，一切冤愆，化作化作微尘。

青华宝诰，金口宣扬，上荐上荐亡灵。

真人手内，杨柳洒滴甘露味，润在亡者喉中。

大慈大悲，普度普度普度众生。

惟愿今宵来赴青华会，接引亡灵，上往往上南宫。

《反干倒拐》

鱼：千千鬼崇低头拜，万万王侯拿简迎。昔日曾为光牧女，发洪誓愿度众生。杳杳冥冥似鬼王，慌慌忙忙失家乡。

哀哀怨怨如孤雁，饥饥渴渴似饿狼。

寂寂寥寥无祭祀，褴褛褴褛受恓惶。

悲悲切切如云梦，凄凄惨惨痛哀伤。

急急忙忙苦忧愁，寒寒冷冷度春秋。

朝朝暮暮莫活计，烦烦恼恼白了头。

是是非非终日有，艰艰难难几时休。

来来往往闻消息，万万千千谁肯修。

分明大说恩光路，欢喜众等赴瀛洲。

（可略）

《大救苦引》

礼拜天尊圣号，解冤灭罪消愆。

度汝幽（灵）魂早生天，大地祥光出现。

来赴甘露胜会，逍遥快乐无边。

九玄七祖尽升仙，全凭法力追荐。

以此真香摄召请，当愿亡者悉遥闻。

仗凭三宝力加持，此日今时来赴会。

运心平等，法力无边。

恭对寒灵前，称扬宝号。

无量功德，慈尊广现身，妙色相甘露王，慈悲救苦超升度。哭声悲声憾云霄，夜迢迢，无量婆伽法谛。

今宵幸遇法筵开，出苦海，摄召幽灵来赴会。

呼唵嚩唎嚩唎，苏呬苏呬，晓咋喃，唎唎唎，萨哩唎穆宅喃婆呵呵呼，唵苏呬苏呬，晓咋喃，唎唎唎，萨哩唎穆宅喃婆呵呵呼，唵步步咖哩呼呼，唵咖哩旦哒嘟哆唎。

仰启青华教主教主大慈悲。普放祥光无数亿。

绿柳甘露洒幽关，普赦地狱诸罪滞。

皈叩十王十王大慈悲，开赦幽灵来赴会。（重）

《阴小赞》

鱼：

经宝号三乘，度脱沉沦，罪业山海尽消融，出离三途并五苦，罪灭福生，罪灭福生。

（略）修真悟道天尊。

《生神章》

鱼：

自然生神章，金书开大有。天尊大慈悲，宣扬秘密咒。

奉荐诸幽魂，诚心来稽首。吾今咒法食，惟愿歆来受。

自然天厨食，吾今密加持。一粒遍十方，河沙鬼神用。

饥渴永消灭，食之赴瑶池。今将献幽灵，功德不思议。

冷冷甘露滋，法食难思议。骞香流七真，冥冥何所疑。

受此法食者，生天登紫微。福田高巍巍，供养冷清清。

一切有为事，普皆成代命。拔离三途苦，施汝九玄庆。

临坛受食者，诸天皆赞咏。七祖生天堂，幽魂朝上清。

愿以不思议，功德妙济力。仗此清净水，化为甘露味。

苏酖摩味天尊。

《孤魂赞》

功文：孤魂幽爽久沉沦，未遇玄元拔度恩。

提科：朝伴白云藏洞穴，暮随皓月隐山林。

功文：春去秋来闻鸟唱，寒来暑往听鱼歌。

表白：早向今宵求解脱，丹天世界尽超升。

法食神变天尊。

功文：太上法食，变少成多。粒米如山，滴水成河。

普遍无边，恒沙数多。孤魂滞魄，永免沉痾。

提科：修设斋筵，广拔无边罪。救苦天尊，来洒甘露味。

太上慈悲，秘咒功德力。加持法食者，赈济幽阴鬼。

《挂金锁》

鱼：

修设斋筵，大慈因缘起。救苦天尊，化现云端里。

手持杨柳，遍洒甘露味。赈济孤魂，法食难思议。

遍洒虚空，普度无边际。接引众魂，脱离诸苦趣。

不违本元，来赴今宵会。证盟功德，普放云厨味。

专等今宵，来赴甘露味。

《刀兵偈子》

鱼：

斋主信心，敬谨虔诚意。正荐先灵，附近来临会。

四生六道，十类孤魂鬼。闻者生天，同赴朱陵会。

专等今宵，来赴甘露味。

枉死城中，凜冽悲风起。鬼门关前，叫苦声动地。

负命图财，冤债相侵逼。自缢投河，飞跌石崖内。

犯法遭刑，刀剑分身体。虎咬蛇伤，蛊毒及魇魅。

痛苦孤魂，愿承恩光力，专等今宵，来赴甘露味。

鳏寡孤独，老幼并贤愚。盲聋喑哑，瘸跛及残疾。

终日懒惰，不务营生理。每日到晚，埃墙又把壁。

好儿好女，与人为奴婢。痛苦伤情，短叹长嘘气。

贫寒孤魂，愿承恩光力，专等今宵，来赴甘露味。

累劫多年，历代帝王位。王子王孙，皇亲皇后妃。

迷失坟茔，国家无人祭。专等今宵，来赴甘露味。

助国安邦，文武忠良辈。舍死忘生，只为名和利。

做贾行商，买卖无心意。恋酒贪花，终日迷昏醉。

奸盗邪淫，抛妻并撇子。老不收心，流落无依倚。

游娼孤魂，愿承恩光力，专等今宵，来赴甘露味。

城市乡村，巧匠并各艺。省府州县，官员司典吏。

道释儒门，术士共巫医。渔樵耕读，庄农为活计。

脚忙手乱，日夜无眠睡。绿鬓朱颜，不觉苍容粹。

百艺孤魂，愿承恩光力。专等今宵，来赴甘露味。

武将雄兵，两阵交锋击。炮响三声，吓的心胆碎。

杀气腾腾，旗号遮天地。

阵亡孤魂，愿承恩光力，专等今宵，来赴甘露味。

雷打火烧，强徒凶恶辈。车碾马踏，肢节如粉碎。

末劫年终，天行时气鬼。乱世饥荒，沿门叫晬吃，

命丧他乡，不得归家去。灵魂飘荡，两眼双流泪，

饿殍孤魂，愿承恩光力，专等今宵，来赴甘露味。

身穿缁衣，摩顶来受记。

奉戒持钵，功行多累积。未明禅机，不达西来意。

圆寂觉灵，愿承恩光力，专等今宵，来赴甘露味。

养性修真，访师求玄理。阐扬法门，符水广救济。

未遇明师，迷朦被魔闭，羽化仙灵，愿承恩光力。

专等今宵，来赴甘露味。

斗秤牙行，希求蝇头利。截长补短，瞞心更昧已。

花言巧语，奸计谎愚迷。造业孤魂，愿承恩光力，

专等今宵，来赴甘露味。

行善之人，常在人伦世。供奉三宝，福力无边际。

舍财布施，结下缘辘会。今遇追修，愿承恩光力，

专等今宵，来赴甘露味。

行恶之人，骂天又恨地。压善欺良，捏死将人治。

谎得钱财，害众成家计。无义孤魂，愿承恩光力，

专等今宵，来赴甘露味。

不信道法，雷声半空里。五色龙云，天降粗风雨。

雷击龙霹，死在路途地。横死孤魂，愿承恩光力，

专等今宵，来赴甘露味。

採砍山林，险峻巅峰立。失手错脚，闪到石崖内。

骨碎皮开，尸横血流地。跌死孤魂，愿承恩光力，

专等今宵，来赴甘露味。

六月炎天，平地火光起。推车挑担，枯热无人济。

口内生烟，一命归阴去。热死孤魂，愿承恩光力，

专等今宵，来赴甘露味。

冬月寒天，路途行客至。身边无衣，冷气临身体。

冰雪遍地，往往无人济。冻死孤魂，愿承恩光力，
专等今宵，来赴甘露味。

杀人放火，十恶五逆辈。王法无情，拿在地狱内。
笞杖徙流，绞斩分身体。横死孤魂，愿承恩光力，
专等今宵，来赴甘露味。

十月怀胎，儿女在腹内。坐草昏迷，果报来催逼。
气血冲心，母腹未分离。产死孤魂，愿承恩光力，
专等今宵，来赴甘露味。

圣号圆满，宣扬今宵会。追荐亡魂，已得生天去。
脱离三途，永超诸苦趣。逍遥快乐，功德不思议。
闻法登天，速证玄家偈。归去来兮，同赴青华会。
面礼慈尊，敬谢恩光力。专等今宵，来赴甘露味。
逍遥快乐天尊。

《咒枣偈》

功文：汝等仙子人伦、魔灵地狱、饿鬼畜生众，吾今施汝供。

众诵：一粒遍十方，河沙鬼神用。

鱼：自然天厨食，吾今为加持。一粒遍十方，河沙鬼神用。饥渴永消灭，食之赴瑶池。今将献幽魂，功德不思议。

万里悲嚎实可哀，五音苦爽出泉台。

贤愚难辨分高下，贫富斋筵普列排。

任使饥寒生饱暖，从今忧闷且开怀。

这回地狱无间阻，自此天堂有路开。

《说三宝》

功文：

示谕汝等诸仙子众，已享天厨之妙供，得闻太上之真经。

静立片刻，听吾宣告。

自从累劫，乃至今生，性本灵明，与天同久。

因贪因著，有死有生。既归有漏之形，不悟无为之道。

千般积业，万种贻愆。奈缘名利之交攻，故有饥寒之相逼。今已魂飞魄散，只存尸鬼而游。气绝形无，焉有幽阴可恋。四大既然空矣，一灵何亘昧乎。

仗此太上之威光，烛彼本来之真性。

澄澄湛湛，了无生死之相关。

混混融融，静合虚无之妙道。

既得丰衣足食，各宜改旧换新。

湛湛青天，现出本来面目。

明明心境，照见自己元神。

回光返照，悟道登真。

先当皈依三宝，然后听受九戒。

功文：

夫三宝者，脱苦海之津梁，登人天之梯级。

守持不怠，得遂往生。

提科：玄元开化道经师，普度天人朝太虚。

表白：接引孤魂升仙界，当坛稽首礼皈依。

道经师宝天尊。

功文：

第一皈依无极至真道宝。

当愿一切有情世生生永消身业，不堕地狱道。

消除身业天尊。

《云乐歌》

鱼：

稽首皈依道，大罗元始尊。慈悲流大教，生死荷玄恩。

愿烧道宝香，生生长供养。

功文：

夫道宝者，杳冥之中，显无象之象。

虚无之外，示自然而然。

为三界之独尊，作万民之始祖。

慈悲广济，应感无穷。开度群生，故为道宝。

《阴三尊赞》

鱼：

清微天，玉清境，道祖凝真五色顶，梵炁弥罗一宫神，金光辉映虚无境。

万天中，绵劫永，出有入无乾元圣，惟愿慈悲降道场，天龙神鬼皆称庆。

大圣道宝天尊。

功文：

第二皈依无量至真经宝。

当愿一切有情世生生永消心业，不堕畜生道。

消除心业天尊。

鱼：

稽首皈依经，三十六部尊。自持为他转，延福济幽冥。

愿将经宝香，生生长供养。

提科：

夫经宝者，赤明肇始，结炁成文。

灿烂而八角垂芒，敷露而玉篇郁秀。

总三乘之蕴奥，广万有之筌蹄。解悟无穷，故命经宝。

《阴三尊赞》

鱼：

禹余天，上清境，大道玉宸君所载，金阙玄台会至真，龙章凤篆传经戒。

度三皇，分五太，灵宝宗主功德大，惟愿慈悲降道场，天神人鬼皆称快。

大圣经宝天尊。

功文：

第三皈依无上至真师宝。

当愿一切有情世生生永消口业，不堕饿鬼道。

消除口业天尊。

鱼：

稽首皈依师，无为离欲尊。见存增福寿，过去早超升。

愿将师宝香，生生长供养。

表白：

夫师宝者，德作天地，道冠三才。

演法度人，随方立教，实仁人之慈父，作古今之医王。

接引群迷，开通未悟。大德难量，故名师宝。

《阴三尊赞》

鱼：

大赤天，太清府，老君玄元尊所部，降炁分形应化身，随方设教为先主。

天人师，儒释父，普济津梁生死路，惟愿慈悲降道场，天龙神鬼皆得度。

大圣师宝天尊。

功文：

夫三宝者，精微至寂，妙湛难思。杳冥之中，恍惚有象。

虚玄之内，感而遂通。各发精诚，勿生懈怠。

鱼：

师宝实难量，大发慈航。

幽冥地狱放祥光，度脱亡灵登天堂。快乐无疆，快乐无疆。

鱼：

皈依三宝师，四生父，一切有情皆得度，刀山剑树化毒林，火翳炉炭成清暑。

步祥云，洒甘露，接引孤魂出迷途。惟愿天尊来降临，孤魂受炼朱陵府。

功文：

宣告汝等诸仙子众，皈依三宝已毕。

从今万罪消除，断却贪嗔痴爱，扫灭奸盗邪淫。

修身按孝悌忠信，莅（lì）政行礼义廉耻。

省心悟道，永离地狱之苦。听戒登真，常享天堂之乐。

示谕孤魂，精诚受偈。

提科：祖师真机秘法传，玄微普济度人天。

表白：坛下仙子来参受，须听真师说戒言。

《说九戒》

第一戒者，敬顺，孝养父母。

切以，归心曰敬，谦和曰让，竭力顺父母颜色曰孝。

生则备服食，死则奉祭祀，曰养。

不得违背父母，忘荐祀之诚。

知礼者，能养其志。劳谦者，能竭其力。

存孩提爱亲之心，尽吾终身之慕。

靡不有初，慎终如一。何以加于孝乎。

受持之后托生人中，获端正长寿果。

能持此戒，名曰初真戒。汝等仙子，可能持否。

众答：天上人间，信受奉行。

第二戒者，克勤，忠于君王。

切以，自胜胜人之果敢。

圣人云，克己复礼，君子之心也，忌刻。

小人之心也，曰克。劳力尽心，终日不怠，曰勤。

执一性命以道事君，曰忠。不得违背君王，就伪忘真。

事君能致其身，食禄不避其难。夙兴夜寐，政修人和。

念兹在兹，可谓忠矣。

受持之后托生人中，获禄位清显果。

能持此戒，名曰念真戒。汝等仙子，可能持否。

众答：天上人间，信受奉行。

第三戒者，不杀，慈救众生。切以，用心损物，曰杀。

忍辱悯物，曰慈。度一切苦厄，曰救。

常以平等慈心，怜悯众生，视同我命。

度脱有情，济恤贫乏。成汤祝网，孔子不纲。

德云甚盛，实胜称名。流水救涸，法妙难量。

无罪何择于牛羊，有养乃至犬马。

见其生，不忍见其死。闻其声，不忍食其肉。

无务于仁。受持之后托生人中，获吉庆安乐果。

能持此戒，名曰持真戒。汝等仙子，可能持否。

众答：天上人间，信受奉行。

第四戒者，不淫，正身处物。

一切不以礼交曰淫，心无邪想曰正。

夫男女有别，人之大伦。血气未定，戒之在色。

心无邪思，性兼尽物。非礼勿动，守死善道。

常须检束身心，勿令放荡滋事。

受持之后托生人中，获清净善性果。

能持此戒，名曰守真戒。

汝等仙子，可能持否。

众答：天上人间，信受奉行。

第五戒者，不盗，损人利己。

大凡世间一切物件，取之不以礼，曰盗。

常须存义，损己利人，布施接物。

切以，千金不盼，何有乎直，不疑诬偿万钟，何加乎宁。

至于季康子患盗，见义不为，无勇也。克己复礼于人乎。

体道自然，以保其身。受持之后托生人中，获富贵豪胜果。

能持此戒，名曰保真戒。汝等仙子，可能持否。

众答：天上人间，信受奉行。

第六戒者，不嗔，凶怒凌人。大凡憎人曰嗔，害物，曰凶。弃物，曰怒。不得动生嗔怒，凌辱万物。

常须处众谦和，灭除心火。切以，血气方刚，戒之在斗。

喜怒中节，发之谓和。

盖有见其过而内能自讼者也，未有不好犯上而好作乱者。

修己以敬，毋过于此。受持之后托生人中，获十相具足果。

能持此戒，号曰修真戒。汝等仙子，可能持否。

众答：天上人间，信受奉行。

第七戒者，不诈，谄贼害善。

夫巧言伪语曰诈，乘时逐势曰谄，阴谋暗算曰贼害。

圣人云，信近于义，言可复也。令色足恭，毋乃佞乎。

媚嫉彦圣，实不能容。绝灭天理，是之谓贼。

成己成物，不妄言绮语。常须正直，表里无私。

受持之后托生人中，获聪明智慧果。

能持此戒，号曰成真戒。汝等仙子，可能持否。

众答：天上人间，信受奉行。

第八戒者，不骄，傲忽至真。

恣纵曰骄，妄自尊大曰傲，举意轻浮曰忽。

夫上帝临，汝瞻之在前。皇天无亲，于乎不显。

骄不居上，傲不可长。得道多助，证圣合真。

一切人物，不行傲慢。常须自省己短，赞服人长。

受持之后托生人中，获大道正法果。

能持此戒，号曰得真戒。汝等仙子，可能持否。

众答：天上人间，信受奉行。

第九戒者，不二，奉戒专一。

一切内无他想，心在方寸，曰不二。

主敬而行，毋忘法律，曰奉戒。

正心诚意，终日省察，名曰专一。

唯一厥德，戒慎其独。高步劫仞，如登春台。

受持之后托生人中，获大法王果。能持此戒，号曰登真戒。汝等仙子，可能持否。

众答：天上人间，信受奉行。

功文：

如斯九戒，实乃三清之隐文，上天所宝，下世不传。

悟一字得一字之功，受一戒得一戒之果。

既闻秘语，必透玄微。琅函展处，当坛说破是非门。

琼诰宣时，对面豁开生死路。

提科：香烛花中不夜天，祥云影里透朱悬。

表白：霞衣玉局临轩降，宝篆金章次第宣。

《生天宝篆》

太上敕赦生天宝篆。

赦赦六道四生，

孤魂滞魄，冥司地狱，北都罗酆，

阴洞冥关，幽扃众囚，泉曲苦魂，

胞孕血尸，产死女魂等众，

夙世以来，至于今日，元因三孽六根，

造诸罪恶，或不忠君王，

或不孝双亲，或诽谤大道，背真就伪，或伤残兄弟，

谋及师尊，或劫贼杀害人命，

或屠割众生自饶一身，

或倚强凌弱，以贵虐贱，

浮好三宝，执心不专，或轻慢师法，

秽贱灵文，或心生阴贼，

暗忍嫉妒，或恶口两舌，

斗乱善人，或杀生淫祀，

体露三光，或心生，或口语，

或自作，或教他，自积以来，

所有诸罪，赦除罪薄，落灭恶根，

不得拘留，时刻升迁，七炁成形，

六仪思虚，五灵续绝，二曜扶衰，

旋罡摄斗，飞步云宫，胎胚有始，

尘劫无终，金孕质城，玉洞凝神，

真气内养，以成真人，上入六虚，

下洞幽泉，云宫宝阙，

中有真魂，出入福乡，

周旋生门，咀嚼灵芝，

灌漱金泉，甘露川流，

玄注丹田，紫霞映朝，
三气凝烟，琼室炼化，
安座金莲，真气晦日，
尘劫为年，一如诰命，风火驿传。

提科：感谢真师给判书，形神俱妙合虚无。

表白：超升好向天堂去，始信玄功庆有余。

功文：

此时因前世修，后世因此时修。

莫谓无缘修不得，至今到岸好回头。

休悲切，免伤情。

这回非是等闲人，翻身举步风云送，化现长空月正明。

诸仙子众，听吾因缘，一性朗然，万劫不迷。

为上良因，志心称念。法桥大度天尊，不可思议功德。

（传戒事毕，本坛出给护送关文，合行宣示。）

功文：

孤魂（亡魂、幽魂）历劫恋尘缘，尽被黑孽万事缠。

提科：旷野幽关昏迷暗，今宵觉醒遇法言。

功文太上洪慈垂妙旨，三皈九戒仗师传。

表白：从古忧苦咸脱化，一性逍遥上罗天。

闻法得渡天尊。

提科：幢幡宝盖下瑶阶，童子传言地狱开。

表白：若要孤魂升仙界，宣上灵书中篇来。

《反八天》

东方八天。亶娄阿耆。无愁观音。须延明首。法揽菩昙。

稼那阿奕。忽诃流吟。华都曲丽。鲜菩育臻。答落大梵。

散烟庆云。飞洒玉都。明魔上门。无行上首。回蹠流玄。

阿陀龙罗。四象吁员。

南方八天，南阎洞浮。玉眸洗洗。梵形落空。九灵推前。

泽落菩台。绿罗大千。眇莽九丑。韶谣缘遄。云上九都。

飞生自騫。那育郁馥。摩罗法轮。霏持无镜。揽姿运容。

馥朗廓奕。神纓自宫。

西方八天。刀利禅猷。婆泥咎通。宛薺滌色。太眇之堂。

流罗梵明。景蔚萧嶠。易邈无寂。宛首少都。阿鉴郁竺。

华莫延由。九开自辩。阿那品首。无量扶盖。浮罗合神。

玉诞长桑。柏空度仙。

北方八天。攬无自首。九日导乾。坤母东覆。形摄上玄。

陀罗育邈。眇气合云。飞天大丑。总监上天。沙陀劫量。

龙汉瑛鲜。碧落浮黎。空歌保珍。恶奕无品。洞妙自真。

元梵恢漠。幽寂度人。

提科：天地造化在中央，心肾无非水火乡。

表白：寄与炼师休妄想，莫留离卦作南昌。

功文：

三阳济炼，最上妙缘。承斯圣力，普济群生。

伏愿，风雷铜柱变清凉之净境，溟冷镬汤化七宝之瑶池。

罗酆山下作蓬莱之阆苑，铁围无间成洞府之仙乡。

三途息苦，八难超升。先亡祖弥，师友宗亲。

速居快乐之乡，早登人天之路。修真霞友，闻法善人。

悟本性之真元，了玄关之要妙。四恩普报，三宥齐资。

一切有情，同登道岸。

志心称念，太乙救苦天尊，酆都赦罪天尊，九幽拔罪天尊，不可思议功德。

提科：功德法事已周圆，诸真上圣各归天。

表白：今宵大说慈悲法，礼毕还当下宝坛。

法桥大度天尊。

功文：玄元开化道经师，普度人天朝太虚。

提科：接引亡魂瞻师座，当坛稽首礼皈依。

《跑马韵》

稽首皈依无上道，回谢太乙救苦尊。

稽首皈依无上经，回谢十方灵宝尊。

稽首皈依无上师，回谢道场诸圣众。

道经师宝天尊。

功文：

法台阐事已周圆，道侣声声赞洞玄。

三界至尊垂玉诰，五方童子捧金莲。

幢幡接引朱陵府，鸾鹤迎归碧罗天。

奉送神仪登云路，福留现在永绵绵。

升天得道天尊。

功文：

辞别尊灵去，华堂再不逢。

今宵道场满，送灵上南宫。

向来召请亡魂，行则行、去则去，这回不必再迟疑，阆苑蓬壶别有天，此间不是留魂地。

若问生途与死途，百岁光阴本虚无。

亡魂若悟原来相，随吾华幡上帝都。

羽众慈悲，送灵脱化。

升天得道天尊。

功文：

向来济炼功德，以遂（功德）云周。

九玄七祖以超升，四生六道而脱化。

男乘白鹤，女跨青鸾。逍遥不夜之天，清净长明之境。

伏愿，东极慈尊放祥光而接引，南丹真老指云路以超升。

道归三千金世界，常安常乐。天京十二玉楼台，爰处爰居。

《快澄清韵》

千江有水千江月，万里无云万里天。

此夜好乘功德力，当来果报善因缘。

众诵：天尊言：

仇人冰泮，冤家债主，自消自灭，孤魂等众，九玄七祖，四生六道，轮回生死，出离地狱，即往东极天界，救苦门庭。救苦地上好修行，只有天堂无地狱。

阎王一见不敢高声，童子夜叉，擎拳拱手；牛头马面，总尽皈依。

一十八重地狱，狱狱逍遥；三十三天天宫，宫宫自在。

超生天堂之境，即无地狱之声。

出离地狱，永离苦难。

径往人天，超生净土，快乐无量，一去一来，无挂无碍。

一去影无踪，何日相逢，要得相见难相见。

除非纸上画真容，梦里相逢。

功文：

亡魂，亡魂，侧耳遥闻，东赴蓬莱岛，南向朱陵宫，西碎金钢地，北免寒冰苦，从此追荐后，举步上南宫。

仰凭道力，为上良因。

志心称念，
随愿往生天尊，
不可思议功德。

视频分享

https://www.youtube.com/watch?v=hdkYDVyo_Nk

<https://www.youtube.com/watch?v=xzUkjB5dL3A>